

اصحي يا مصر

أحمد فؤاد نجم

الفهرس

٤	يا فلسطينية
٦	باحبك
٨	الأخلاق
١١	قل أعوذو
١٢	سايجون
١٥	الشعب الزين
١٨	حسبة برما
١٨	بمناسبة زيارة ابن الهرمة
٢٠	ديستان
٢٢	محكمة
٢٤	ع اللي حاصل
٢٩	ورقه.. من ملف القضية
٣٦	نيكسون جاء
٣٩	ساتيا جراها
٤١	الراوي _ قال الراوي
٤٤	من فضلكم
٤٦	تاجر
٤٧	اطلع من دول
٤٨	بلح ابريم
٥٠	يا بهية
٥١	دعاء الكروان
٥٣	الصوت المصري
٥٥	شوبش طرزان
٥٦	غابة
٥٨	إصحى يا مصر
٦٠	جنوب لبنان
٦٤	موال فلسطيني مصري
٦٦	يا عرب
٦٩	انتظار
٧١	استغمايه
٧٦	طهران
٧٨	أول كلام

٨٠	الفرحة.....
٨٢	الرعب.....
٨٤	الثورة.....
٨٥	الهلوسة.....
٨٨	الأقوال الماسورة.....
٩٠	النداله.....
٩٢	الخالق الناطق.....
٩٤	التضليل.....
٩٦	آخر الكلام.....
٩٨	الكلمات المتقاطعة.....

يا فلسطينية

يا فلسطينية
والبنديقاني رماكو
بالصهيونية
تقتل حمامكو في حداكو
يا فلسطينية وأنا بدي اسافر حداكو
ناري في أيديه
وأيديه تنزل معاكو
على راس الحيه
وتموت شريعة هولاكو
يا فلسطينية
والغربة طالت كفاية
والصحرا أنت م اللاجئين والضحايا
والأرض حنّت للفلاحين والسقايه
والثورة غاية
والنصر أول خطاكو
يا فلسطينية
والثورة هي الاكيدة
بالبنديقية نفرض حياتنا الجديدة
والسكه مهما طالت وبانت بعيدة
مدّ الخطاوي
هوه اللي يسعف معاكو
يا فلسطينية
فيتنام عليكو البشارة
بلنصرة طالعة
من تحت ميت ألف غارة

والشمعة والعه
والامريكان بالخسارة
راجعين حيارى
عقبال ما يحصل معاكو

باحبك

باحبك با حبك
با حبك با حبك
با حبك با حبك با حبك
يا مصر
مسايا وصباحي
أصبح بحبك
وحبك شفايا
وجراحي يا مصر
واسافر بحبك
واميل زي ميلك
وتحلا الخطاوي
في حبك يا مصر
واحب اغتراني
في صبحك وليك
واحب الونس بالرفاقه
يا مصر
تنام الدموع في العيون الهواجع
وتسهر دموعي
في حبك يا مصر
تهون السجون
والشجون
والمواجع
ويغلا مع القهر حبك
يا مصر
ولو يحبسوني

ولو يشنقوني
ولوا فكروا بالعذاب
يبعدونى
ح اقرب واقرب
مش ممكن اهرب
وتتنزل دموعي على خدودي
تشرب
تلاقى الرموش والحدود والمباسم
مراسم
وصورتك عليهم يا مصر
باحبك با حبك
با حبك يا مصر
القاهرة / ١٩٧٩

الأخلاق

مناعه ارزاق
جلابة ارزاء
يا سخامه يا لطامه
ياللى اسمك اخلاق
ازيك وايش حالك
ايه اخر الانبياء
دجوكى؟
سلخوكى؟
خلوكى اشلاء
ما انا قايل وسمعتي
بس انتي اللى طمعتى
فى بلدنا يعوزكي
مسكوكي دقوكي
بدماغ الدقماق
بالقاضييه الفنييه
صرعوكى السجانه
حبوسكى
فى قضيه
مرفوضه وخسرانه
والتهمه الجنائيه
اكنك انسانه
وخدوكى الشرطيه
وعساكر هجانه
وابولكنه فرنساوي
طبال ومغناوي

بيغنى اشتراكاوى
والعالم طرثانه
وابو عسكر حرميه
بيبرطع فى تكيه
ويقول اشتريه
والناس
لسه جعانه
يا هيله يا فضيله
يابتاعه المهابيل
بلا وكسه
بلانيله
بلا هفه مخاليل
دى بلدنا
ولا حولا
ما بقاش فيها علاوله
وعوضنا على المولى
فى ولادنا الشماليل
ياديننا ورجليننا
اسسنا وعلينا
وعملنا اللى علينا
جيل يطلع ورا جيل
ويقول ابنوا لبكره
والبنى ادم ذكري
نتحمس للفكرة
من كتر التطبيل
واخيرا ولا اخر
اخلاقنا بتتاجر
ومهازل

ومساخر

وهزيمة

وتضليل

القاهرة / ١٩٦٧

قل أعوذو

قل أعوذو

مد بوزه

الجبان

إبن الجبانة

كلُ غدانا

قام لقانا

شعب طيب

كل عشانا

١٩٦٨

سايجون

أبجد هوز
حطي كلمن
إفتح صفحه
إمسك قلمن
إكتب زي
الناس ما بتتطق
سقطت سايجون
رفعوا العلمن

طلعت شمس اليوم دا
أغاني
كل ما نسمع
نعشق تاني
طلعت شمس اليوم دا
حريقه
تشفي الجرح
وتبري الألمن

سايجون عادت للثوار
فوق الدم
وتحت النار
جدوا فوجدوا
زرعوا
فحصدوا
وإحنا إدينا للسمسار

واللي قالوه السمسارجيه

واللي حكاه السمساردار

لما قروه القروانجيه

بالمستعدل والمندار

هتش ونتش

بعزم الصوت

عن أمريكا وهوا أمريكا

زعموا الفانتوم

شاييل موت

سقط الموت بعلم أمريكا

جاتكو فضيحه

يا طبقه سطحيه

وعامله فصيحه

وجاييه العار

قروانجيه

وكتبنجيه

وسمسارجيه

وسمساردار

سايجون دره يا ثوار

عادت حره

للأحرار

داحنا حنشبع بكره أغاني

إسمع وحفظ يا كتباني

واثبت عندك فى الأوراق

مصر بتتضح بالأشواق

مصر عروسه

وبكره عريس

والعشاق إحنا العشاق

فيما وبيننا وبيننا الثورة

إحنا الثورة

وهي الناس

فيما الماضي

وبيننا الحاضر

والمستقبل

هو الناس

الشعب الزين

تكریم عین الشعب الزین
فی عمان
و فی القطرین
شعب عنید
یقول ما یرید
وشو ما یقول
ع الراس والعین
و یا مروح زعق بالجای
تکرم عینک یا أبضای

تکریم عین شبیبه ملاح
یفدوا الثورة
بالأرواح
شالوا بجنح اللیل سلاح
وشالوا الرقبة
ع الکفین
ونحننا زلامکم
یا ثوار
ولو بتزیدوا
نعدي بحار
ولا رجعية
ولا استعمار
بتفرّق بین الأخین
و یا مروح زعق بالجای
تکرم عینک یا أبضای

تكرم عينيك الفدائيه
مصايح الأمة العربية
ع طريق الوحدة الحتمية
من حد المغرب
للشرقين
وشو شبك
يا للي تريد لبنان
غريب الأهل
عن الأوطان
ع طرابلس
حود من شان
تشوف لبنان
رايح عا وين
ويا مروح زعق بالجاي
تكرم عينك يا أبضاي

يا فلسطين يا جرح الناس
و يا مسيب أوجاع الراس
بتضل تسهر حراس
هموم القلب
و دمع العين
ولا يملك غير جرح جديد
و نز رصاص
و دم شهيد
و سيف بتار ونار وحديد
تعيد الحق ترد الدين
والرايح يزعق بالجاي

تكرم عينك يا أبضاي

معتقل القناطر / ١٩٦٩

حسبة برما

بمناسبة زيارة ابن الهرمة

كشف الرافضين
ببطارية ماركة - نانسين -
يهوديه عرييه
سته مشاغبين
وستميه سته وستين
واتنين صنايعيه
سبعة مداقرين
وسبعميه سبعة وسبعين
غاويين شيوعيه
ألف وستين
وربعميه
منهم عشرين
وتلاته وطنيه
أما الباقيين
فألف ميه وتمانين
طلاب وشضليه
تسعه وتمانين
من إللي راحوا تشرين
تحت المعديه
يبقي موافقين
حسب انضباط القوانين
والحسبه شرعيه
تسعه وتسعين وتسعميه وتسعه وتسعين

من ألف في الميه
أجري التدوين
بمبني بندر قافشين
وبلجنه مدنيه
طرطور الدين
رئيس نيابة هابشين
وشكوكو عدويه
وحسين حابسين ضابط مباحث عابدين
والست سريه
لجنة
عشرين
شبرا ومغاغة
وقلين
أسوان دقهلية

ديستان

فاليري جيسكار ديستان
والست بتاعة كمان
حجيب الديب من ديله
ويشبع كل جعان
يا سلامم يا جدعان
ع الناس الجنتلمان
داحنا حنتمنجة واصل
وحتبقى العيشة جنان
التليفزيون حيلون
والجمعيات تتكون
والعرييات حتمون
بدل البنزين
بارفان
وحتحصل نهضة عظيمة
وحيقى علينا القيمة
فى المرسح او فى السима
او ف جنينة الحيوان
وحتبقى الاشيا زلابية
ولا حوجة لسوريا وليبيا
وحنعمل وحده ارابيا
مع لندن والفاتيكان
والفقرا حياكلوا بطاطا
وحيمشوا بكل الاطة
وبدال ما يسموا شلاطة
حيسموا عيالهم

جان
واد بفضل صديكي
ديستان الرومانتيكي
ولا حدش فيكو شريكي
في المسكن
والدكان

محكمة

إسمع وشوف ما حصل
برضه السمع واجب
قاضي المظالم وصل
واتأكد الحاجب
غمز بعينه لمره
وراح مكسكس ورا
القاضي قال محكمة
وهو قال
مجزرة
مع إنه قبلها بدقيقه
عامل عون
نازل شتيمه وأذى
في عساكر الكركون
مجعوص بيقرا الصحف
و يرد ع التليفون
و يمر في وسطنا
كأنه نابليون
وفجأة فز انتنر واقف على حيله
كرشه الجسيم انهطل
أنا قلت دا ديله
قول حبتين وانتصب
باسم العدالة ميزان
مدموغ بكلمة شرف
مش كلمة السلطان
ممكن يشيل الهرم

وينخ من شعره
حسب الظروف والعلل
والرك ع الوزان

أول قضية شطح
سمي الرعيه جاموس
تاني قضيه نطح
قال ع الضحيه
جاسوس
تالت قضيه وأنا في الأصل
راجلها
سألني إيه شكوتك
أنا قلت أجلها
لما الميزان ينصلح
وبلاقي وزانه
من الصباح للمسا
صاحبك يعدلها

معتقل القاهرة/ ١٩٧٠

ع اللي حاصل

ع اللي حاصل في الحواصل

يا سلاملم

يا سلام

الكلام عايز إذاعة

و الوطن عايز كلام

و الإذاعة مستباعه

للمياحه في الغرام

و البلد آخر مجاعه

و الجماعة في انتخام

و اللي يخشى إنه يمشي

جيم وريه ودال ولام

ينقح الكلمة رصاصة

ع القصيدة وع المقام

تدوي زي الرعد

تدوش

تهتك الليل واللتام

و ينكشف جسم الحقيقة

تظهر اللقمة الحرام

يا سلاملم يا سلام

و الوطن عايز كلام

و الإذاعة مستباعه

قول يا عم الشيخ إمام

ما حنا قلنا م البداية

وانتو عارفين الختام
حيث وإن الصالة بوظه
والحضور نيام نيام
والمجال فيه ألف قاضي
كل قاضي وله مرام
والشهود نسيوا الشهادة
والقضية والكلام
والقفص بيت الضحايا
و الهلالي لما قام
قلّعوه روب المحامي
و النيا به ع الغلابه
طبقت بند اللجام

يا سلامم يا سلام
و الوطن عايش آلام
و الإذاعة مستباعه
قول يا عم الشيخ إمام

بينما الحالة نيله
و البلد بالعه الفتيله
و الخواجه بألف حيله
جاي يلغوص في البرام
يحكو عن أسطى الفلاسفه
إنه أفتى
ولا أفسى
في القضية الهيكلية
وإن دي
ما هوش منافسه

و أنت مالك يا أسطى فلس
جاي تحسس أو تلمس
الخواجه لما فلس
جانب دفاترينه القدام
دشدش الباترينه تبعه
شد شعره

عض صابعه
إنت إيه شأنك تتابعه
أمّا مخك مش تمام
شالوا هايكل
جابوا علوه

كلهم في الهم بلوى
إنت شوف لك سهره حلوه
بكام قزاره وجوز حمام
واحنا شايفين الخواجه
واللي جايبين الخواجه
وجنا كاشفين كل حاجه
و أنت تتنيل تمام

ع الهيافه في الكلام
شوف يا عم الشيخ إمام
خلق فاضيه
وعامله قاضيه
وهي موضع لاتهام

بينما شهدانا لسه
دمهم أخضر.. ولسه

جرحهم في القلب لسه
بيواجعنا
لو ننام
و أن صحينا
نلقي غابه
ضبعت فيها الديابه
والكآبه ع الزحام
والغلا كاوي الغلابه
و الكآبه ع الزحام
يحكوا عن واحد صاحبنا
كان أمين دايرة صاحبنا
والدواير
قرع داير
ع الجميع قرّن صاحبنا
نزّل العداد وهاتك
واعلا
وانزل بجنهاتك
خد مراتي وهات مراتك
كل ماشي يا عب سلام
واما ريحة القرع فاحت
ع اللي باني
واللي فاحت
والإشاعة جت وراحت
جابوا تفسير المنام
فضحوا فنانه في زمانها
بعد الزمان غبنها
رحنا مصر وجينا بنها
و حنا سارحين في الكلام

يا سلاملم يا سلام
و الوطن عايش آلام
و الإذاعة مستبأعه
قول
يا عم الشيخ إمام

القاهرة/ ١٩٧٥

ورقه.. من ملف القضية

- = إنت شيوعي
- أنا مصراوي
- = إنتو مصايب إنتو بلاوي
- ممكن أعرف مين الأول بيكلمني
- = إحنا نيابة أمن الدولة
- دول مين
- = دولة مصر
- مصر العشه ولا القصر
- = أيوه حنبدي ندور ونلف حاجه تترفز خالص
- إف
- مالك... شايل طاجن خالك
- = لم لسانك ما تخرفش
- أنا ما اقصدش اهانتك طبعاً
- = أيوه استعبط
- لاما اعرفش
- = إيه رأيك في سفارة كوريا
- إيه رأيك في قضية مصر
- = مصر ف وحده
- هى وسوريا وليبيا ولازم ييجي النصر
- ييجي منين وازاى ولمين
- = أدى كلام الشيوعيين
- أنا من حقي
- = حق ف عينك
- أنا بتكلم بيني وبينك
- = يعني كلام بره التحقيق
- إذا كانش يسبب لك ضيق

= طيب قول

- مين مسئول؟

= مين مسئول عن إيه يا إخي

- ع إللي جرى لنا ف غزه وسينا

= أنت شيوعي أكيد وطاوعني

فض دمك من دي قضيه شعبنا جاهل

مهما تقول له

مش حيان بالشيوعية

- ما الشيوعية في فيتنام

إيه رأيك فيهم يا همام

= مش بطل مش بطل

لكن إحنا.. ورانا عيال

- طب ما نحارب لجل عيالنا

يطلعوا أسعد من أجيالنا

= إنت الظاهر مخك فاضي

وحتتعبني معاك ع الفاضي

وأنا بحببت معاك بكفايه

إبقي اتفلسف عند القاضي

- هي قضيه؟

= لأ ملوخية

أمال فاهم إيه آمال هي الدولة دي لعب عيال

- ممكن أعرف أنا هنا ليه

= أيوة حتعرف

أمال إيه

يوم خمسه وعشرين الماضي

إيه مشاك عند التحرير

- تحرير إيه يا جناب القاضي

= أنا مش فاضي

- بكرة تصوير
 = بطل غلبه وجاوب دوغري
 - أنا غلباوي كده من صغري
 = كل الشيوعيين أمثالك
 آخر غلبه وقله ذوق يحصل إيه لو تمشي ف حالك
 فاكتر نفسك مين
 ما تفوق
 - لو راح افوق
 مش من مصلحتك
 = أنا معجب جدا بصراحتك
 إيه رأيك فى حكاية الطلبة
 - حاجه عظيمه بشرة خير
 = إنت دماغك ينفع جزمه
 - وانت لسانك ينفع سير
 = إخرس قطع لسانك سافل
 - كتر خيرك
 = مخك قافل
 مين وداك بقي عند الطلبة رايح ضمن المندسين
 - رحت أناقشهم واسمع منهم
 = تسمع منهم إيه يا سي طين
 دول عايزين الدنيا تولع علشان أصلا
 مش فاهمين
 هى الحرب يا عالم لعبه
 دى بتتكلف بالملايين
 = وأنت حتدفع إيه من جيبك
 - امال ح ادفع من جيب مين
 إنت حمار وخدوك فى مشمك رحت هناك زى الباقيين
 عاملين لجنه

وقال وطنيه
مش ممكن دول وطنيين
وجماعة أنصار الثورة
وفلسطين وهباب الطين
ما نخلينا يا سيدي في حالنا
مالنا ومال الفدائين
هو إحنا اللي نهبنا بلدهم
دول عالم صيع فاقدين
قتلوا الراجل عند الشيراتون
وإحنا إللي طلعلنا القاتلين
- وصفي التل دا كلب وخاين
= اهو كل العالم خاينين
واحد صاحبي مراته مرافقه
وهو مرافق
بيجي عشرين
أمريكا بتزعل وبتحرن
هو إحنا يا عالم ناقصين
مش نستعبر
م إللي جرالنا
ونعيش بقي زى العايشين
دي عيال عملا للشيوعيه
وإحنا عدو الشيوعيين
- ورق دمك بس يا بيه
مين مساعدكو بقالكو سنين
= ببساعدونا صحيح يا سي بعجر
علشان أصلا مش فاهمين
إحنا حيلتنا منين نديهم
ونسددهم بالملايين

= يمكن يعني قضيه مبدا
- مبدا مين وزكايب مين
هي دى عالم تعرف مبدا
دولا باقول لك
ناس مجانين
اخترعولنا السد العالي
علشان نبقي اشتراكيين
إشتراكيه هناك ف بلدهم
وإحنا ف دارنا
نعيش حرين
عايزين الفلاح الجاهل
يتساوى بالمحترامين
وكمان قال
تحديد ملكيه
أبو ألفين
يدوه خمسين
شغل ملاحده وعالم كفره
ومخالفين أحكام الدين
والعمال رخرين اسم الله
فاهمين روحهم
بني آدمين
ناس عايزين الحرق بولعه
دا كله من الشيوعيين
نشروا لنا الأفكار السوده
أولاد الكلب الملاعين
مين وداك بقي عند الطلبه
انطق قول
اتكلم مين

- هما إيه مطالبهم؟
 = انت حتستجوبني يا شاطر
 - لأمش قصدى
 بس أنا باسأل
 كانوا طالبين كراريس ومساطر
 ولا مطالب ميه الميه
 كل الشعب مآمن بيها
 =دول طالبين حرب وشعبيه
 مين مجنون بقي
 حيمشيها
 عايزين يدوا الرتش سلاح
 عشان تحصل فيها مجازر
 أنا لو أشوف حلوف فلاح
 شاييل شومه
 لازم اهاجر
 - لازم بينه وبينك دم
 = دم ف عينك
 هس اتلم
 ثم نحارب ليه
 وبايه
 بسلاح ما يموتش بعوضه
 - ورق دمك بس يا بيه
 الحرب ضروره ومفروضه
 واهو نفس سلاحنا المظلوم
 في فيتنام دابح أمريكا
 = دى طبيعه أرض يا بني آدم
 - بطلوا بقي كذب وبولوتيك
 طب ما الهند بنفس سلاحنا

في باكستان
بعزقت الغرب
= رأيك يعني ضروري ان إحنا
وحتما يعني نخش الحرب
طيب
حاضر
فين المخبر
حتغير رأيك
بالضرب
—

نيكسون جاء

أب ت ث جح

ألف باء

جونسون روح

نيكسون جاء

قولوا هاوأو

أو قولوا هاء

على صحافتنا

الغير غراء

ذات صباح

يا فتاح

بالجرانين على ريق النوم

جم على سهوه

كبسوا القهوه

وابتدأوا ف تضبيع اليوم

إللي يقول النصر نميس

ينفع تاكسي

وبمشي رميس

وإللي يقول الفوردي يا بيه

أجعض من أجعضها جعيص

وإللي يقول جونسون دا حمار

راجل

عقله عقل صغار

راجل تيس

من غير حيث

ينصب ألف جنازه بطار

بس اهو ارح
وحنرتاح
وحنتبجح بقي ونقول
يخرب بيته
وبدلق زيتيه
ويعيش نيكسون لنا
على طول

نيكسون عال
ومش بطل
واللي يقول غير كده
مقفول
شففت كلامه
إلا كلامه
صح كلام راجل مسئول
ولا عنيه
يا ختي عليه
فيهم سكس ماهوش معقول
واللي يقول يا بقر يا شراكسه
نيكسون ماله ومال النكسه
واللي يقول بلوتنا كبيره
واللي يقول فضوها سيره
واللي يقول مين مسئول
واللي يقول
واللي يقول
شوفوا بقي يعني
ما تفلقونيش
آدى صحافتنا

وغيرها ما فيش
مش عاجباكو ما تلومونيش
قولوا هأو أو
أو قولوا هاء
على صحافتنا
الغير غراء

ساتيا جراها

إلى روح المهاتما غاندي محرر الهند العظيم

ساتيا جراها

ساتيا جراها

تبري السقم

وتشفي العامه

لف المغزل ثاني ثاني

إغزل توبك

واغزل ثاني

ملعونه السلعة البراني

و اللي جلبها

و اللي قناها

ساتيا جراها

ساتيا جراها

تعني سلام

لا سلبيه ولا استسلام

لكن

خطوة تسير قدام

بالشعب

إن هب وخطاها

ساتيا جراها

ساتيا جراها

يا ولاد الهند يا غافلين

وبقي لكم ع الحال دا

سنين
البقرة تحت السكين
وخلصها ف كلمة
و معناها
ساتيا جراها
ساتيا جراها
تجمع شعب
اتغرب
تاه
ضاع من بعضه
يا ولداه
مش فاكر
غير كلمة آه
من عله استعصت
ودواها
ساتيا جراها
ساتيا جراها

القاهرة/ ١٩٦٧

الراوي _ قال الراوي

يا سادة يا كرام
صلوا على خير الأنام
الحلم في العلم
بكره اللي جاي
أخضر
والشعر في الحلم
فارس بيتخطر
راكب حصان السبق
شاهر
حسام قاطع
رايح يجيب النبأ
زي النهار
ساطع
ويطلع الفجر
فوق السحاب لاغير
يا سامع الشعر
فكر
تشوف أكثر
وحدوه

حكايتنا
كانت من قديم القدم
ولسه كاينه
ويا ما لسه تكون

طول ما العمار مسكون
بالغفلانين ياما
طول ما الغضب مكنون
جوه الصدور
ياما
طول ما القليل حاكمين
والمحكومين ياما
طول ما احنا متخانقين
والشمتانين .. ياما
طول ما احنا نبقى كده
والظلم
فوق كل دا
ممکن تعود الحكاية
من أول المشوار
وتلف بينا الرحايا
دوار
ما بعده دوار
ويخش ديب الصبايا
في عباية السمسار
ياكل فراخنا العتافي
ويدبح
اللي صغار
الحلم
يتأخر
والشعر
يتبخر
ويغرق الشمس
بحر الضباب الاصفر

يا صاحب العقل

فكر

تشوف أكثر

وحدوووه

من فضلكم

- من فضلكم وبإذنكم
دلوقتي حنقدم لكم
- دلوقتي حنقدم لنا
- سيده الأغا وكلب الأغا
سمسار حارتنا يلغا
حنش دماغه في المحيط
وديله سيبه عندكم
من فضلكم وبإذنكم
- من فضلنا وبإذننا

- من فضلكم سيده الأغا
نصاب وغاوي الفنطزه
- نصاب وغاوي فنطزه
- وبإذنكم كلب الأغا
سايق عليكو العنطزه
- سايق علينا العنطزه
يعني الأغا وكلب
متسترين بجهلكم
- من فضلكم وبإذنكم
من فضلنا وبإذننا

من فضلكم سيده الأغا
مالوش وطن غير سوق وبار
- مالوش وطن غير سوق وبار
وبإذنكم كلب الأغا

-عنده الإله هو الدولار

عنده الإله هو الدولار

يعني الأغا وكلب الأغا

متمنجهين من فقركم

من فضلكم

وبإذنكم

شمل الحبايب فرط

بعدت أمانينا

و الندل لما احتكم

باع واشترى فينا

يا غربة جوا الوطن

يا وحدة الإنسان

لما قصر عقدنا

طالت ليالينا

تاجر

تاجر نزل سوق
شاف غزاله
مع الدلال
قرب يدوق العسل
نهر الدموع شلال
شرب عديم التنا
من دمعنا المسفوح
زاد في السعار والغنا
من خسه الدلال
اخص
اخص
اخص.. على كده

اطلع من دَوْل

اطلع من دول يابن الالبليس

اطلع من دول يابن الهرمه

تلبسوا قفاطين

تلبسوا تاليس

انت البورمه

غير هلاهليك

يا خواجه

وهدوم دلاديلك

يا خواجه

وان شا لله تخش ف تلاجہ

يا خواجه الناجه كوا الناجه

حتشيل سمسارك في شكاره وحتطلع

واكل.. بالصرمه

بلح ابريم

يا بلح ابريم يا سمارة
سواك الهوي ف العالي
هويت
على طمى النيل ياسمارة
وشريت عكار
لما استكفيت
بس احلويت قوي يا سمارة
لما اسمريت قوي ياسمارة
لفيت الشارع والحارة
على زى نقاوتك فين
ما لقيت
يا حلاوة بنار
يا حلاوة بنار الشمس النور
يا سمارة وعمار الصحرا البور
شباك الهوى
داير ما يدور
اتاريك دبت وطبيت
بس اغلويت قوي ياسمارة
لما اتدليت قوى ياسمارة
ونزلت الشارع الحارة
سوقك
لا رخصت ولا اتدليت
يا بلح ابريم
ياسمارة

حصنت بعقدك صدر الناس
من شر النخاس الخناس
ياجو قلب لا سوسه
ولا سواس
ورقيتك يا اسمر
واسترايت
الضم حبابيك بقي ياسماره
وافتح شبابيك لقا يا سماره
على جو الشارع
والحاره
تحلو زياده
وتملا البيت
يا بلح ابريم يا سماره

يا بهية

يا بهية وخبرينا
ع اللي جتل ياسين
في الصحرا وفي المدينة
اليوم دا ومن سنين
ناس تمشي
وناس تجينا
واحنا متبعترين
ولا صاري على السفينة
ولا مربوط للهجين
و الدنيا بتجري بينا
و احنا متوخرين
يا بهية ولملينا
نطرح مليون ياسين

دعاء الكروان

دار الفلك
فى المغزلك
طول السنين
ما أمهلك
ياناسج الروح
ف الحياة
الحب لك
والخلد لك
انت الازل
وانت الابد
والهالك
اللى يجهلك
يا شعب
يا نبض الوجود
الحكم لك
والملك لك. الملك لك. الملك لك
الليل حلك
والبوم
سلك
والبحر
عطشان منهلك
والسهم طاش
اسقي العطاشى
انت الكريم
وبنسالك

يهودا خان؟
اكم يهوذا
وباع مسيح
لا يهوذا دام
ولا جرح
بيلازم جريح
مليون يهوذا
خان امانك
وانهلك
وفضلت باقي
ع السواقي ومنحك
يفرش حصير القمح
فوق دم المسيح
وانت الجريح
تيجى الاطبا وتساءلك !!
ما اعجبك
ما انحبك
ما املكك
يا شعب
يا روح الخلود
ما انبلك
الحكم لك
الملك لك الملك لك
الملك لك

الصوت المصري

(١)

فيه قاضي اتعين قاضي
بيرد جميل مولاه
بيبيع الذمة " بنكله"
و يشرد خلق الله
لمجرد إن الحاكم
طلعه ف الصورة معاه !

(٢)

فيه قاضي أساسا
قاضي
و معقد من جواه
و بابا كان أصله حرامي
واترقى " بفضل الله "
ودا يحبس كل الشرفا
لمجرد
يرضي بابا !

(٣)

فيه قاضي صحيح
مش قاضي
حاكم
بحدود الله
ودا صنف عزيز
" في بلدنا"
زي الألباظ.. تلقاه
و أنت القاضي اللي ميزانك

وجدانك

عمره ما تاه...

و يكسر المستشفيات

و يقرب المستبشرين

ويبعد المستقريات

و يركب المستبطين

وييسط المستركبات

و يحلل المستريطين

(٤)

كان حكمك

" فعلا قاضي "

ع الخاين. واللي وراه

كروان

ف الليلة الضلمه

بيلعلع. وامصراه

الله ع الصوت المصري

الله الله الله

شوبش طرزان

زغروطه للحزب الجديد
حيدمر الحزب إللي فات
ويحطم السكه الحديد
ويربط المستحلات
ويعجز المستقرين
وبقدر المستعجزات
ويرجع الأيام سنين
ويعيد زمان المعجزات
مع إن طرزان الوليد
ذات نفس
طرزان إللي مات !!

غابة

هم هم هم هم هم هم
هم هم هم هم هم هم
- غابة كلابها ديايه
نازليين ف الناس هم
و اللي ينام ف الغابة
راح يتاكل هم
غابة بتاكل ميتة
غابة بتشرب دم
هم هم هم هم هم هم
هم هم هم هم هم هم
- غابة كلابها ديايه
نازليين في الناس هم
غابة وناسها غلابه
خيخه.. لا ناب ولا فم
متكليين ع الصدفة
متاكليين بالهم
هم هم هم هم هم هم
هم هم هم هم هم هم
- واحنا يا ملح الغابه
هم يحرك هم
ضايعين
وسط ديايه
مش فاضيين نهتم
فاهمين وبننتغابي
مش راضيين نتلم

هَـ هَـ هَـ هَـ هَـ هَـ
هَـ هَـ هَـ هَـ هَـ هَـ هَـ

إصحى يا مصر

اصحى يا مصر
اصحى يا مصر
هزى هلاك
هاتى النصر
كونى يا مصر وعيشي يا مصر
مدي اديكى
وطولى العصر
اصحي وكوني وعيشي يا مصر
اصحى يا عامل مصر يا مجدع
وافهم دورك
ف الوردية
مهما بتتعب
مهما بتصنع
تعبك رايح
للحراميه
جهدك عملاك
رزق عبالك
عرقك مرقك
ولا يهنا لك
اصحى يا عامل
غير حالك
صون المصنع
واصنع مصر
اصحى وكونى وعيشي يا مصر

اصحى يا زارع مصر الخضره
قدره وخضره
ونور وجمال
ابدر غيطك
واحمى البدره
ضد الافه
والاستغلال
ارضك عرضك
باب الدار
صبحوا مداسه
للسمسار
نعطش
ولانشريش عكار
وصفه قالوها الحكما يامصر
اصحى وكونى وعيشي يا مصر
واصحى يا جندى
يا تار الشهدا
عمى وخالك
اختى واخوك
لجل ما تهدا وتارك يهدا
فرغ نارك ف اللى خانوك
يابن الشعب يا حامي الشعب
انت املنا فى يوم الصعب
اصحى يا جندى ودق الكعب
حرر مصر وطهر مصر
اصحى وكونى وعيشي يا مصر

جنوب لبنان

إلى الخصرة...
عيون الأهل والأوطان
وعفوا
عن سبب جهلي
تمام الإسم والعنوان
وعفوا
كوني أتشرف
باني اليوم اراسلكم
ولا أنزل منازلكم
أنا إنسان بسيط
مجهول
ماليش في الهيئه شان وكيان
لانا دكتور من الجامعه
ولا شاعر
ولا فنان
ولا محسوب من المحاسيب
ولا باتحط في الإعلان
ولا عالم
ولا عالمه
بتطلع صوري في الجرنان
أدينا في العذاب صحبه
وفوق نفس الطريق
ساييرين
ومهما تبعد الصحبه
أكيد واصلين
ومتقابلين

أخويا زناتي
كان منكم
وبتكلم كثير عنكم
حكي لنا زمان
" وكان موجود "

عن الزعتر
وعن مسعود
وعن سلمان
وعن سلمي
حكاوي تشيب المولود
وعن عبله
وعبير الورد
وعن عنتر
هزيل العود
وعن إنسان
بيات إنسان
ويصبح في الصباح
طوربيد

زناتي يجز على نابه
وهو بيحكي لصحابه
ولاد الكلب دول يا ولاد
مناظر
إنما أوغاد
نهار مالمو لمتهم
برمتهم
ورمتهم
وعبوا الغدر ف سلاحهم

وسنوا سنان خيانتهم
نهارها الجو كان إسود
سواد بصفار
وجوف الأرض بيطلع
خراب ودمار
وكان يوم القيامة صحيح
على الأطفال
وع المجاريح
وكان برضك نهار أغبر
على الأندال
وعكس الريح
لأن الشهدا م الثوار
لاولوا الضهر
والأدبار
ولا خانوا الحمي والدار
عاشوا كبار
وماتوا كبار
وفوق الخد بسمتهم
دي الحاجه إللي كادتهم
ويسكت لحظة يتأمل
ويرجع تاني ويكمل
ولاد الكلب آخ منهم
يبيعوا بالدولار دينهم
ولاد الكلاب آخ منهم
حييجي اليوم وأحاكمهم
وراح مسكين
فندات مره
ما نالاش مرامه بالمره

زناتي الباقيه في حياتكم
خدوه لارناكا
مات بره
خدوه ازاي
ومات ازاي
أهم قالوا انه كان رايع
يدافع عن شرف بلده
زناتي
إللي اتولد مظلوم
وعاش محروم هنا ف بلده
خدوه قبرص عشان رايع
يدافع عن شرف بلده
ومهما نقول
ومهما نعيد
حنقتل
والسلب حيزيد
خلاصة القول ومعنى القصه والموال
سلامى للجميع واجب
نسا ورجال
خنادقكم
بنادقكم
وبرضه عشمنا فى الأتي
وهلبت القريب آتي
أخوكم فى الكفاح والهم
وبكره
فى السلاح والدم

موال فلسطيني مصري

يامه مويل الهوي
يامه مويليا
طعن الخناجر ولا
حكم الخسيس فيا
الصبر حلم العواجز
يطرح زهور الأمانى
والقهر عدى الحواجز
وأنا إللي واقف مكانى
شايف غيطان البشاير
خايف. وكانن إديا
حتى الحمام إللي طائر
ما رضيش يرفرف عليا
يامه مويل الهوي
يامه مويليا
طعن الخناجر ولا
حكم الخسيس فيا

سألت شيخ الطريقة
ما رضيش يجاوب سؤالي
ودارى عني الحقيقه
وفاتني حابر ف حالي
سألت شيخ الأطباء
دوا الجرح إللي بيا
نظر لي
نظره محبه

وقال دوايا بايديا
يامه مويل الهوي
يامه مويليا
طعن الخناجر ولا
حكم الخسيس فيا

يامصر
وانتي الحبيبة
وانتي اغترابي وشقايا
وانتي الجراح الرهيبة
وانتي إلهي
عندك دوايا

علمني حبك عباره
سهله
وبسيطه
وعفيه
شرط المحبه الجساره
شرع القلوب الوفية
يامه مويل الهوي
يامه مويليا
طعن الخناجر
ولا
حكم الخسيس فيا

يا عرب

يا عرب

يا عرب

يا عرب في أي مصر

يا عرب

يا عرب

إسمعوا صوت شعب مصر

احفظوا لمصر المكان

وإحنا ع العهد إللي كان

مصر أوفي م الزمان

وانتوا عرفين شعب مصر

يا عرب

يا عرب

يا عرب يا أهل مصر

إللي خانوا العهد بينا

واستباحوا كل حاجه

واستهانوا بالعروبه

واستكانوا للخواجه

مستحيل حيكونوا منا

إحنا حاجه وهما حاجه

هما باعوا البنديقه

والوطن والجلابيه

وإحنا أصحاب القضيّه

إحنا ما بنبعش مصر

يا عرب

يا عرب

يا عرب يا أهل مصر
يطلع الدجال بزيفه
يملا بحر النيل ضباب
ينزل الجراد بسيفه
يزرع الموت والحزاب
يطول الليل زي كيفه
الصباح له ألف باب
وإحنا بوصلتنا ف ادينا
ما تخافوش م الليل علينا
مهما غبتوا عن عنينا
انتوا جوه في قلب مصر
يا عرب
يا عرب

يا عرب يا أهل مصر
سينا ولا
يافا ولا
حيفا ولا
دير يا سين
إسألوا الشمس إللي هاله
ع إللي صحىوا مبدرين
يزرعوها
نور وغله
دول جدودنا
ولا مين؟
حقنا وحتما يعاد
بس لو باننت سعاد

والبيان ده

له معاد

والمعاد

حيكون ف مصر

المعاد

حيكون ف مصر

انتظار

باستتظرك
باستتظرك
رغم القساوة
ف منظر
لحظة هروبك يا رباب
م الحب لما استتصرك
باستتظرك
باستتظرك
باستتظرك
رغم الشتا
والبرد والرعد المخيف
باستتظرك
ف الشارع المشغول
باو حال الرصيف
أنا اصلي حاسب موعدك
وعارف اللي بيبعدك
وأنا اللي خابر
تبقى مين
وأنا اللي صابر
من سنين
وباعد لك
مطرح ف بستان الامل
وبامد لك
وف كل خطوة

أمدّ لك ايدي اللي شققها العمل
مدي الخطاوي يا حبيبتي
وقدّمي
وان كنتي خايفه م الطريق
اتبسمي
يا شمس ياللي ضحكك
قمر ينور سكتك
أنا اللي عشقك
عزني
وانتي اللي عشقي
يستاك
باستنتظرك
يا جرحي يا حلمي العنيد
باستنتظرك
يا مصر يا حبي الوحيد
وحتيجي يوم وتصدّقي
عشقي الأصيل وتحققي
حلمي الجميل وتزوقي
عمري اللي ضاع
مستنتظرك
باستنتظرك
باستنتظرك

استغمايه

غمي عيونك

سد ودانك

إفتح بقاءك

قول انا فين

الشاطر فيكو

يحزر فزر

في دقيقتين

والإشطر منه

اللي يحزرها

في غمضة عين

والإشطر خالص ما يحزرها

يقول انا فين

والإشطر أشطر

اللي يبص يشوف بالعين

انا فين؟

فيه ناس

اختلف في الموضوع

وحكاوي اتقالت

عن مواضيع

والناس لا مؤاخذه

في زمن الجوع

يتعشوا كلام

يفطروا تشنيع !

فيه واحد شافني

بلبده ولاسه

في باب اللوق

والثاني

لمحني بققصين موز

علي باب السوق

والتالت شافني

في كاديلاك

راكب مع بنتين

والرابع

شافني ف طنطا

بابيع

بلابيع ونشوق !

وصحافه الصاوي

والورداوي

والجمال

وأباضه ولاظه

وباقى الدلايل

والأندال

بتأكد جدا

جدا جدا بالتدقيق

إن انا محبوس

وباروح يوميا

للتحقيق!

طب اصدق مين

وأكذب مين!؟

ماهي حاجه تمخول أيها عاقل

وانا مجنون
وباكلم نفسي
وعقلي صراحه
ماهوش مضمون
لو كنت بلبده ولاسه
وماشي ف باب اللوق
طب إيه مشاني
مفلس جدا
جنب السوق؟!
لوكنت بدأت
كتاجر فاكهه
وبقفصين؟
مش كنت زماني
معلم طمبه
وجوز اتنين؟

لوكنت ف كاديلاك
زي ما قال
التالت بيه
ومعايا بنات
زي الشرابات
طب ح انزل ليه!؟

لوكنت يا طنطا
بابيع بلابيع
وسطل وبخور
مش كنت زماني
مدير على جامع

أو مأمور؟

وصحيح الصاوي

والورداوي

والجمال

حابسين أفكار الناس

في بلدنا

وعال العال

إياك قاصدين

إن انا مسجون

زي الملايين؟

كده يبقي تمام

ولأول مره

ح اقول " صادقين "

بس انا لا مؤاخذه

وبالتدقيق

ماحصلشي معايا

ولا تحقيق !

مش حاجه تحير

طب أنا فين؟

حزرتوا خلاص

فزرتوا خلاص؟

عارفين

أنا فين

أنا ساكن قلبي ومتونس

بالناس

والناس الونسه كثير

ماليين القلب

وشاغليه
سارحين في الدم
وفي التفكير
وجناين قلبي العمرانه
بالناس
الأزهار
العصافير
سايعاني
وسايعه اللي باحبه
وتساعي معايا
رفاقه كثير
شايفين انا فين؟
الشاطر فيكو
يحزر فزر
في دقيقتين
والأشطر طبعا
يحزرها
في غمضة عين
أنا..... فين؟

طهران

صباح الخير يا طهران العزيرة
صباح النصر
وبلوغ المنال
عزفنا الفرحة غنوه
و قلنا الشعر
وركبنا الخيال
أديكي صحيتي بعد النوم
عروسة
ولا كل العرايس في الجمال
شهودك ناس
ومهرك ناس يا غالية
يا أعلى الناس
حلال فيكي الدلال
نذاكي ضحكة
ف عيون العذارى
و شمسك فرحة ف عيون الرجال
ونسمة صُبحك الصاحي
بشائر
لبكره الآتي
بالعيد للعيال
وغنوة عندليبك
ف العلالي
شراب العاشقين
و بعد الوصال
صباح الخير

يا طهران الوفيّة

أول كلام

كلامنا عن ايران
ما لوش طبعا مكان
فى اعلام الخيانه
وصوت الامريكان
لان الامن شايف
بان الأخ خايف
ليلزق على الشفايف
وبلبس فى الودان
كلام عن الخيانه
ومن عالم جعانه
فتظهر الادانه
على الشاه اللى خان
ادانه يعنى ثوره
ما تقبلش المناوره
وفضح وكشف عوره
واخر بهدلان
فليه الامن يرضى
بيحب للمعارضه
دى عالم يابا مرضى
واغلبهم جعان
وهكذا الطريقه
طناش
على الحقيقه
فتبقى الناس

غريقه
وتسمع شقالبان
لهذا
او لذلك
حنمشى فى المسالك
ونطلع م الزمالك
نخش الترجمان
وكلمتنا نقولوها
حليب من بز أبوها
فناسنا يسمعوها
فيحصل بغبان
فهاات ودنك يا خلي
اقولك وانت قوللي
وسيبك م اللي واللي
ونحكى
عن ايران

الفرحة

فرحانين فرحانين فرحانين

كل ثورة

واحنا دايمًا فرحانين

اللي ماتوا ف المعارك

فرحانين

و اللي حضر واللي شارك

فرحانين

و اللي ساكنين ع المبادئ

فرحانين

و اللي شايلين شوق لفكره

فرحانين

و اللي حاملين هم بكره

فرحانين

و اللي معدتهم جعانة

فرحانين

و اللي كلمتهم

أمانة

فرحانين

إحنا ملح الأرض

وتراب العجين

كل صناع الوجود

و المبدعين

عد موج البحر

و نجوم الليالي

عد رمل الأرض واكثر

م السنين

كل ثورة دائما واحنا

فرحانيين

كل ثورة واحنا دائما

فرحانيين

الرعب

مرعوبين مرعوبين مرعوبين

مش باقولك يا حبيبي

مرعوبين

اللي رقصوا ف حضن كارتر

مرعوبين

و اللي كانوا فاكرينه عنتر

مرعوبين

و اللي سافروا لجولدا ماير

مرعوبين

و اللي بيغلوا السجاير

مرعوبين

و النسايب والقرايب

مرعوبين

و المشايخ ف الزكايب

مرعوبين

والسفاك المصريكاني

مرعوبين

و الفراخ الأمريكاني

مرعوبين

كل حكام الخيانة المأجورين

و السماسرة والحشم

و الطباخين

مهما يحاولوا يخوفوكوا

بالعساكر فتشوههم

حتلاقوهم مرعوبين

مش باقولك يا حبيبي

مرعوبين

الثورة

مارد رفض وانتفض
زلزل عروش العار
الشمس ولا الجبل
ولا المحيط هدار
ولا القمر في السما
فجر سحاب النار
ولا الربيع انتشر
غطى الوجود ثوار
ولا النشيد انطلق
عالي على الأسوار
طير سلاح الحرس
من لمسة الأوتار
ولا نسيم الصبا
ولا هوا الأعصار
أنت الجميع كلهم
والكل فيك حضار
يا شعب لما رفض
يا شعب لما اختار
سطر بدم الشرف
أنشودة للأحرار
نار الخيانة حطب
نار الشعوب
صبار

الهلوسة

انا متأسف جداً جداً
عندي سؤال
متلخفن جداً
ايها واحد
لو يجاويني
انا متشكر
جداً جداً
كلنا طبعا نعرف جداً
ان خميني الجامد جداً
بعد الثورة
وكشف العورة
وقال بالصوت الواضح جداً
ان مفيش لعصابه بيجن
ولا بتروله
لما حتن
كلنا برضك
نعرف جداً
ان خميني الجامد جداً
اعلن هذا
قوللى لماذا
قالك ثوره شعب ايران
ملك الشعب العربى كمان
والمستقبل
غير الفايث
يعنى التار العربى البيايت

يتأخذ
أبا عن جد
كلنا ايضاً عارفين جداً
أن مناجم
حيص جداً
وانفحت ف رقبته قزازه
واترسمت لعصابته جنازه
واتبعتر هو واعوانه
وانخضت امريكا
عشانه
واتهزت واترعبت جداً
ودا كان هایل
جداً جداً
على حين فجأة
جداً جداً
زي الشئ التافه جداً
طلع الشاهنشاه الكورو
اتمطع جيص من زوره
انه عميل
ومغفن جداً
قال الشئ التافه جداً
قصده يطمئن بيجن جداً
انه بتاعه وملو دراعه
ضد خميني
الجامد جداً
والبترول يا خدوه من سينا
والمركب ترسي ف مراسينا
واحنا اخوات

وبتوع بعضينا
وحانتمنجه جداً جداً
من غير صهيوني ما يادن
ممکن اسال
جداً جداً
يبقى الشئ التافه جداً
خاين جداً جداً جداً
ولا مهلوس
جداً جداً؟
انا متشكر جداً جداً

الأقوال الماسورة

المجد للشاه
فى الاعالى
وبالناس المذله
وعلى الارض
الخراب
" شاهبور با ختيار "
من سفر ما قبل الخروج
حبيبك وصاحبك
وصاحب حبيبك
كلام كله فارغ
عديم المعانى
اذا الندل صاحبك
يصاحبك لعله
وتسمع كلام
زى كذب الاغانى
وانا اللى اشتريت الخسيس
بالخساره
وبعت الاصيل
اللى يا ما اشترانى
واول ما هبت
رياح النهايه خلعنى الخسيس
من صباعه ورماني
الشاهنشاه رضا فهلوي

من سفر الخروج
اخويا الامير
بزرميظ الايراني
وعظني ونصحتني
وسلك وداني
لان اللي نابيه
يا حبه عنيا
ما يتخلوش
أي كاتب اغاني
دا كان لمسّه قاعد معايا
النهارده
ولابس خواتم ذهب
امريكاني
صحيح الشعوب
بنت كلب ولتيمه
وممكن
تزريح العروش في ثواني
" واحد صاحبنا "
من سفر ما بعد الخروج

النداله

يا كارتري يا ندل
حبيبك وصاحبك
وصاحب مراتك
وتبقي انت صاحبه
وصاحب مراته
وكان والده ايضا
مصاحب حماتك
وكان برضه والدك
مصاحب حماته
وطول عمره نافد
على استخباراتك
وشغال جاسوسك
على استخباراته
وقاعد يزود
رصيد ملياراتك
وسارق
وشايل معاك ملياراته
وراجل مامنك
وخاين ضميره
وخايف
وحاطط ف ايدك مصيره
ودابح ف بحبك
الوف الضحايا
ودايس ف طين الدنس
والخطايا
يقوم لما يطبق عليه المحيط

تطنش يا كارتر
وتعمل عبيط
وتخلع
وتتسي الحمار والغبيط
وتاكل عيالك
بدون وجه عدل
صحيح
انت ندل

الخالق الناطق

ايران يا مصر ، زينا
كان عندهم..
ما عندنا
الدم هو دمنا
والهم من لون همنا
تمسك ودأنك من قفاك
تمسك ودأنك من هنا
الخالق الناطق هناك
الناطق الخالق هنا
الارض حبلى بالربيع وبالغنى
والجو
مشحون بالقصايد والغنا
والشمس
فوق الكل تشبه شمسنا
والثروة
ملو الارض والناس والبنا
بس العصابه الامريكاني
مريعه
فوق الغلابه
والديابه مضبغه
والصحفجه العرصجيه الاربعه
لابسين صاجات
وكل حاكم له غنا
تمسك ودأنك من قفاك
تمسك ودأنك من هنا

الخالق الناطق هناك
الناطق الخالق هناك
نفس البلاوي
ع الغلابه مثنتله
من فقر شوف وهم خوف
نازل بلا
والقهر زاد
والسيف على رقاب العباد
والمخبرين زي الجراد
ملو الخلا
والفنانين المومسين
والفنانات
دول شغالين
تبع وزير الاعلانات
يحصل جواز
يحصل طلاق
يحصل ممات
دول مبسوطين
ومايجين طول السنه
تمسك ودانك من قفاك
تمسك ودانك من هنا
اللى حصل فيهم هناك
لازم حيحصل
عندنا

التضليل

دا شيعه
واحنا سنه
دا فين ومصر فين !
عايزين يدخلونا
نظام ودنك منين
وناس تقول شيوعي
وعامل نفسه شيعي
عشان خايفين طبيعي
ليبقوا ثوريتين
يا أسيادنا اللصوص
قرينا ف النصوص
لو الإنسان يلوص
يغوروا الفرقتين
وشفنا ف الكتاب
ولقينا الدين حساب
وثورة وانتساب
وعين تساوي عين
وسرقتوا الثورة منا
وقلتوا الصبر منه
وعقب الصبر عنه
وباب بمفتاحين
ودان المَلِك ليكو
وزاد الفجر بيكو
وعملتوا اسلامين
وكفرتوا الامام

وطفشتوا الحمام
وخلصه الكلام..
يزيد ولا الحسين !!؟؟

آخر الكلام

واه يا خي اه
ياخي
كنا نملا الدنيا ضي
بس اه
لو كنا زي
الف اه
واه يا خي
كنا جبنا الشمس
من برج الاسد
واديناها للعيال
غزل البنات
يطبعوها ع الهدوم
والكراسات
يشبكوها
ورد شعور البنات
ينظموها
عقد من شر الحسد
يضوي نوره
لما يضوي
كل حاره وكل حي
بس اه لو كنا زي
الف اه
واه ياخي
كنا المظلوم اذا هاجم
جري

كنا لو كان السلاح فى يدنا

والمعارضه

يد واحده عندنا

دسنا شاهنا

وامريكانه بنعلنا

وابتدينا الثوره

من اوسع طريق

كان تمتناشر يناير

ف الشوارع لسه حي

بس اه

لو كنا زي

الف اه

واه ياخي

الكلمات المتقاطعة

بدل الكوره
ولعب الفوره
وسط الغاغه
والبرجاس
تاكل زغده
تاكلك دبشه
تملا دماغك
بالقلقاس
ياللا نفكر
حتة لعبه
زي السكر
بالأناناس
كلمه ومعنى
رأسي وأفقي
يحكوا حكاية
تهم الناس
قرب قرب
ياللا نجرب
شغل مخك
ولا تحتاس
_ واحد رأسي؟
رأسي بتضرب
تقلب
تشغي بالأفكار
مسرح

والأفكار هوامه

في الدوامه

ليل.. ونهار

أبيض إسود

أخضر.. أحمر

بارد.. حامي

جنه.. ونار

سيبك سيبك

من تغريبك

بكره الليل

يطلع له نهار

_ اتنين رأسي؟

حاكم حالي

كان طرطور

خان الدار

والجار

والنور

_ كل ما فينا من حكام

نازلين

من خنفس.. وكافور

كذبوا _ أفكوا

قتلوا _ سفكوا

غدروا _ خانوا

فضحوا _ هتكوا

_ واحد أفقي؟

شاعر داعر

ميت.. حي

طالع.. نازل
رايح.. جي
مادح سيده
مادد ايده
لايشوف حاجه
ولا يقول شي

_ كل ما فينا من شعارير
خونه

وهتيفة.. وخنازير

تجروا _ باعوا

لمعوا _ ذاعوا

أفلوا _ غربوا

تاهوا _ ضاعوا

_ انتين أفقي؟

شعرا تلاته بكلمه باروده

ناظم

بيرم

بابلو نيرودا (١)

_ كل ما فينا من عشاق

داقوا ما بينا

من أشواق

حبوا _ عشقوا

شبووا _ نشأوا

مروا _ فاتوا

غرسوا _ رشقوا

_ رأسي وأفقي؟

شاعر واعر

لازم جي

يملا عيون العالم ضي

كل ما فينا من أحزان

تستتظر عاشق فنان

يأتي _ يقبل

طائر _ بلبل

حرفي _ فني

يشدو _ يغني

وطني سكاني

أهلي .. قومي

منكم فيكم

صحوي نومي

أنتم فكري

أنتم عملي

منكم توقي

فيكم أمني

هيو _ لبوا

ثوروا _ هبوا

يشرق _ يسطع

صبح _ مطلع

يزرع _ يبني

نحصد _ نجني

نمرح _ نلعب

نشدوا _ نغني

واحد رأسي
نشدوا نغني
اثنين أفقي
نشدوا نغني
ثالث خامس
عاشر ميه
نشدوا نغني
نشدوا نغني
نملا العالم
خضة عفيه
نشدوا نغني
نشدوا نغني